

Munduko



Maratoi Kopak

42 kilometro arrakasta bidean

Munduko Maratoi Kopak 3.000 korrikalaritik gora bilduko ditu gaur Donostiako kaleetan

42 kilometro luze daude arrakasta eta porrotaren mugan; batzuentzat, Diego Garciarentzat kasu, garaipena izango da arrakastaren baliokide, beste guztia, berriz, porrota. Maratoilari herrikoientzat, ordea, —3.100 guztira—, bukatzea bakarrik garaipen handienaren pareko izango da. Proba, nesken mailan 9.00etan hasiko da, mutilenean, berriz, 9.15etan. Irteeran, protagonista nagusiak, Txinako atletak izango dira, ea zertarako gai diren.

R. OLASAGASTI / DONOSTIA

Donostiako maratoiak bere zitarik garrantzitsuenean —Munduko Kopa hala baita—, inoiz baino maratoilari gehiago bilduko ditu gaur, 3.100 korrikalari herrikoiei eta goi mailako 200 (125 mutil eta 75 neska). Guztira, 35 herrialdetako atletak hartuko dute parte, baina 35 horietatik batek itzal egin die gainontzeko guztiei; Txinaz ari gara, noski, edo txinatarrez hobeki esan. 'Ez-bairik gabe eurak izango dira Munduko Koparen garaile', 'munduko marka onenaren jabe egingo dira', edota, '2.26.00 munduko errekorra barregarri utziko dute' horiek bezalako hipotesiak barra-barra entzun ditugu egunotan. Eurak izan dira titular gehienek protagonista eta dopina gora, dopina bera, aurtengo edizio hau marka ikusgarriarik ezean txinatarren edizio moduan



gogoratuko da.

Ibilbideari dagokionez, dena hiri barnean zehar izango da. Irteera Madrid hiribidean, helmuga, berriz, Anoetako estadioan. Bien bitartean, ditantzia ezberdineko hiru itzuli egin beharko dituzte partehartzaileek. Lehena sei kilometrokoa, bigarrena 16koa eta bukatzeko hirugarrena 20koa.

Gizonezkoen partehartzea ez da hain goi mailakoa izango. Denboraldian zehar maratoi

onenak egin dituzten gizonak, Vincent Rousseau belgikarra, Kim Woan-Ki korearra eta Ahmed Salah djiboutiarra esaterako, ez dira Donostiara etorri. Alabaina, Manuel Matias (2.08.38) portugaldarrak eta Luis Soares (2.10.03) frantziarrak, Diego Garciarekin bat, denbora ona egin dezakete, guztien esanetan, ordea, Belayneh Dinsamoren 2.06.50eko munduko errekorretik urrun ibiliko dira. Hain zuzen, Diego Garcia azkoitiarrak

du, partehartzaile guztien artean, hirugarren denbora onena: 2.10.30, hain zuzen. Bere helburua, bi ordu eta hamar minututik jaistea da, eta egindako adierazpenen arabera, bada horretarako gai.

Aipatu Matias portugaldarra eta Soares frantziarrak gain, Garciaren aurkari nagusiak Nerurkar britainiarra (2.10.57), Antonio Silio argentinarra eta Durbano italiarra (2.11.13) izango dira. Hala ere, Garciak Espainiako

beste lau taldekideen (Vicente Anton, Alberto Juzdado, Ricardo Castaño, eta Antonio Peña) laguntza izango du, bera baita liderra.

WANGI BEGIRA DENAK

Gizonezkoen partehartze guztia emakume bakar batek itzali du, Junxia Wang txinatarra hain zuzen. Aurtun 3.000 eta 10.000 metroetako munduko errekorak bere egin dituen emakumeak atletismo munduko txinatarren iraultza nagusitu du. Berarekin bat, Junxia Qu izango da, baina honek lesioa du ezkerreko zango-tibian eta baliteke Wangentzat erbi lanak egitea lehen hamar kilometroetan, hau da, lasterketa apurtu bitarte. Wangek ere, Junren Ma bere entrenatzailearen esanetan, «arazoak ditu eskutik zangoan». Hori baina, balizko porrota justifikatzeko estrategia ere izan daiteke, edo zergatik ez, garaipena —munduko errekorrekin bada hobe—, are harrigarriago egiteko.

Txinatarra alba batera utzita, emakumeetan Albertina Machado portugaldarraren debuta izango da aipagarri. Machadok, Rosa Mota taldekide beteranoarekin bat, bere burua probatu nahi du maratoian eta aukerak izan baditu. Firaya Sultanova errusiarra edo Adriana Barbu, Auricia Buia eta Elena Murgoci errumaniarrek ere izango dute zeresanik gaurko maratoian. Lehia politena, beraz, emakume mailan ikus dezakegu, aurrez behintzat, Diego Garciak zer egin dezakeen alba batera utzita, gerra partikularra iragarri baita nesketan: txinatarra gainontzeko guztien aurka.

Nebiolo: «Estadio ederra, partehartze ikusgarria... Donostiako Maratoi Kopak arrakasta ziurtatua dauka»

R. O. / DONOSTIA

Munduko Maratoi Kopak atletismo munduko agintari eta arduradun nagusiak bildu ditu Donostian, guztien ginetik, noski, Primo Nebiolo Nazioarteko Atletismo Federazioko (IAFF) burua. Berarekin batera, Istvan Gyulai IAFFeko idazkari nagusiak, Odon Elorza Donostiako alkateak eta Jose Maria Odriozola Espainiako Atletismo Federazioko buruak prentsurrekoa eman zuten atzo Gipuzkoako hiriburuko udaletxean.

«Txapeldun handiak bildu dira Donostiako edizio honetan, 30 herritako korrikalariak, guztiak ere maila handikoak eta horrez gain atletismo denboraldia ixten

duen azken proba garrantzitsua da Donostiakoa. Arrakasta, beraz, ziurtatua dago», esan zuen Primo Nebiolo IAFFeko buruak. Lehendabizi eskerrak eman zizkien Donostiako alkateari eta Jose Maria Odriozolari antolakuntzan egin duten lan itzela behin eta berriz goraipatuz. «Gaurko protagonista nagusiak, nola ez, Txinako neskak izango dira; mundu osoa maratoi honi begira dago, beraiez idatzi eta esan den guztia egia denentz ikusteko».

Partehartze ikusgarriaz gain, Donostia hiriarantz eta bereziki Anoetako estadioarentzat ere izan zuen laudorio hitzik Nebiolok: «Edizio honetan ez dago balio dezakeen aitzakiarik, dena da aldekoa; bai ibilbidea, bai esta-

dioa. Anoeta, zoragarria da, moderno oso, eta edukiera egokia. Gainera, sariak, maratoian inoiz eman diren handienak izango dira, ia 68 mila milioi pezeta guztira. Atletiei zorte on esatea besterik ez da geratzen». 1995etik aurrera, baina, Munduko Maratoi Kopa, «diru arazoak direla eta», Atletismoko Munduko Txapelketaren barnean korrituko dela esan zuen.

Jose Maria Odriozola Espainiako Federazioko buruak hitzaldi labur batean bere esperantza zein den azaldu zuen. «Nik uste guztion burutan dabilela munduko errekorren bat hausteko itxaropena, ez dut esango zein mailatan, baina errekor hori edizio arrakastatsu bat biribiltzeko

ezin hobea litzateke». Odon Elorzak ere nahi berdina erakutsi zuen: maratoia bakean ospatu eta Donostia mundura zabaldu. Donostako alkateak, gaurko maratoiak baldintza onenak izango zituela aurreratu zuen gainera.

Nebiolo, azkenik, kazetarien galderei erantzun zien. Txinatar kazetari batek, Txinako atletek Txinan bertan korritutako Uda-berriko Maratoian lortu munduko errekorra ea zergatik ez den ontzat ematen galdetu zion. Nebiolok, Gyulai idazkariaren laguntzaz, «distantzia, ondo neur-tuz gero, ez zen maratoikoa» erantzun zion, eta marka gainera, munduko errekorra ez, baina «denbora on bat besterik ez» zela gaineratu zuen.



Primo Nebiolo.